

觀龔駢馬

古儷

文堂

長沙徐楨立署

庚午歲仲春月刊

觀古堂駢儷文

南陽葉德輝煥彬甫撰

募修宋福王趙忠定汝愚殯墓啟

昔者盧植名儒魏武下令以除其墓徐穉高士顧劭入郡而祀其塋拱木已積綿林法師之德音宿草如新贈稽侍中之官爵豈不以鶴歸華表狐死首邱千載以上之陳人凜然生氣百世而下之頑懦興者聞風倘遺跡之未湮斯英靈之不泯何況阡岡鬱鬱畱正氣於乾坤祠廟峩峩有大勳於社稷生則朝廷之柱石沒爲箕翼之星辰赤手擎天挈黃袍而定策丹心貫日扶素幄以朝元斯則柴侯墓前松挺後凋之節鄂王墳畔樹分南向之枝如宋諡忠定

封周王丞相趙汝愚者本以宗藩玉牒之親而承顧命金  
滕之重雖有東國流言之漸究無南宮復辟之嫌假使龍  
鼎之夢難誣羊瑗之生有應安知不如武侯之中興漢祚  
令公之再造唐基何至一汴二杭等殘棋之難收拾十街  
三市聽秋蟲之亂朝昏而乃羣小盈廷趙鼎易折奸臣秉  
軸韓盞難敲屈平之放汨羅鴟夷飲恨賈誼之弔湘水鵬  
舍生災暴薨之耗傳自衡州歸殯之期遠逾湘浦迄今一  
抔荒土猶傍妙高之峰百尺殘碑誰尋稚子之闕本朱張  
講學之友魂魄相依當洪楊寇亂之餘劫灰未燼玉魚金  
盃時出人間石馬銅屏長眠壠畔雖滕公槨見鬱居此室  
已三千年而柳下壟成宜禁採樵于五十步爰乃鳩工大

舉馬鬣重封人皆負土之侯葩客豈墮江之王果所冀粉  
榆父老薦紳先生發思古之幽情表勸忠之令典敢當師  
石萬鈞移蜀帝之碑眾志成城一錢起劉智之廟將見赤  
黃之氣散作雲霞山水之音時聞絃管霍去病之營冢山  
擬祁連魯校尉之藏幽地成直瀆長沙之民十萬戶識伍  
子胥樹檟之墳天水有國三百年畱鄭所南畫蘭之土  
按宋史羅必元傳必元進賢人嘉定十年進士知餘干  
縣趙福王府以汝愚墓占四周民山必元直之據此則  
知忠定已歸葬餘干墓不在長沙也或者當時權殞于  
此後人慕其忠義存此抔土永示不忘耳



擬奏請以宋趙忠定汝愚加封列入祀典公呈

爲宋室孤忠湘江遺廟公懇奏請加封列入祀典以隆報  
饗而繫謳思事竊以聰明正直曰神義垂經訓死事勤勞  
則祀禮順輿情有宋謚忠定封周王故丞相趙汝愚殞省  
治南門外之妙高峰墓西南隅曰納湖今名南湖港有廟  
在焉地望本善化名區事蹟載湖南通志山邱蓬顆片石  
歸然里社叢祠瓣香在此其由來舊矣嘗考宋史列傳稱  
王學務有用忠不慮身本天潢貴胄之親居樞密要津之  
地於時兩宮多故儲位久虛太上寢疾而垂危羣僚解體  
而乞罷人心爲之騷動國本幾於震搖惟王國爾忘家才  
堪濟變奉御批而定策請內禪以垂簾黃袍擁立新君素

幄扶登大寶卒使宗社得安如磐石欖宮永奉乎山陵此其勲勞著社稷精忠貫天地史傳所稱洵無媿矣然人知王之功比伊周不知王之學宗孔孟人知王爲救時良相不知王爲理學名臣時則大儒若朱熹者方以差知潭州諭降獠洞黃裳以爲學不及而欲進之於宮僚畱正謂其性過剛而恐不宜於直講王獨首相薦引不次超遷俾侍講于經筵得盡心而啟沃假使內無韓侂胄居中用事外無趙彥逾盡疏指誣則慶元之新政何難繼述于祖宗崇憲之象賢並得增光于歲史而乃衣冠黨禁湯鼎謠成熹旣以直諫而去官王亦以流言而得禍始則永州安置示朝廷有必欲殺之心卒之衡郡暴薨授守臣以合謀死之



意此所以讀考亭學案歎黨禍之亂是非而過長沙故都  
景忠靈而深仰止也伏思柳下之壟禁其採樵嚴陵之祠  
薦以行潦矧乃禦災捍患澤被一方立懦廉頑風聞百世  
斯固春秋報賽宜俯順乎民心廟祀尊崇非侈陳乎神道  
紳等感懷明德取鏡時艱援古人祀社之文彰盛世勸忠  
之典爲此呈懇 台前賞准察核示遵可否據情奏請加  
封列入祀典俾隆報饗而繫謳思伏候 鈞裁具呈以聞



善化雷優貢故妻錢夫人墓誌銘

夫人錢氏甯鄉錢崇光之長女也遙遙華胄系出彭鏗頤  
頤碩人佼如齊子閨門具禮幼不匱於孝思淑女好逑人  
皆稱其窈窕年二十四歸吾友善化雷君愷于歸百兩知  
鵲有之盈居威儀三千嫺雞鳴之問視爰自釐降逮事舅  
姑蓄榛栗以佐旨甘采蘋蘩而供祭祀山容河潤表象服  
之委佗日往月來守牛衣之困厄雷君方以茂才異等蜚  
譽上庠揚雄好學不爲章句之儒鄭玄舊貧遂去廝養之  
吏羊皮未遇誰惜屢屨驥足將騰終離羈勒迨乎五年博  
習已成大學之基四術興儒遂入司徒之籍祿代耕而捧  
檄不卑小官□□□而鳴絃暫畱尹尉夫人克修內政無

間人言上則敬奉其尊嫜下則輯和其妯娌一門雍肅時  
聞環珮之聲三黨交親日敘壺觴之樂以是瓶罍不罄土  
夫無內顧之憂宜乎瑱璿相安君子獲偕老之慶胡乃昊  
天不弔豎子爲災積善無徵沈疴不起紅壺貯淚猶看血  
色之霑衣紫玉成煙但見眉痕之掩岫以癸丑年九月六  
日酉時卒於長沙里邸距其生爲光緒丙子閏五月朔日  
亥時春秋三十有八粵以甲寅年十二月十六日葬於善  
化石馬鋪月亮山之陽巽山乾向無子女一雷君以滄桑  
有變陵谷終移命表芳徽勒名貞石嗚呼張瞻炊臼增人  
失釜之悲莊窆鼓盆觸我亡舟之痛銘曰

懿惟令婦出自彭城女師淑慎母教賢明作配馮翊相夫

有成珠胎兌索玉質坤貞中霄比翼大陸塵兵清寧失序  
憂患賤生巫陽下詔王母將迎塵宵委佩月夜聞笙青山  
不改白日先傾人疑鶴化客善驢鳴哀彼行路眎此高塋



湘潭袁法毓繼妻傅德春墓誌銘

夫人傅氏諱德春湘潭鄉嗇夫傅承毅之季女也殷巖作  
相衍支裔於南陽漢節封侯振聲華於北地分璇源之別  
派世系清河擗瑤圃之奇葩仙根閩苑穠如棠棣詎獨王  
姬美若茗華寧惟岷女十三教織愛蘇蕙之回文二八知  
書誦左芬之佚句爰自登筭之歲爭修納幣之文以光緒  
二十九年八月適同里袁法毓爲繼室求我庶士未愆梅  
標之期宜其室家遂叶桃夭之什尋鸞膠而再續琴柱新  
調鍊兔魄以重圓鏡臺依舊于時夫人鵲巢甫定蝸舍初  
營北郭先生披羊裘而偕隱東鄰姊妹攜蠶薄以扶將升  
堂則仇覽免冠貫酒而馬卿滌器斯固金蘭託契戴弘無

出入之嫌綠葉成陰杜牧有遲來之感已既而珪月待闕  
金飈戒寒天道無親地維遽裂飛龜之散遣疾難期畫龍  
之符畱年不效薛靈芸之血淚貯滿壺中盧媚兒之口脂  
空流枕上以癸丑紀年七月二十五日子時卒於殘梅村  
之里宅距其生爲光緒十三年十二月二十四日子時春  
秋二十有七卽以其年八月吉日葬于苦竹坪之鳳形山  
癸山丁向子一文偉女二載貞菊貞霜飛員嶠先封節女  
之陵日薄虞淵遂掩賢姬之墓弄羊家之條脫緣託三生  
夢牛相之花牋香聞十里銘曰

九嶷之野二妃所都有命神媪降生麗姝浣紗西子采桑  
羅敷賤日殊眾好女有夫其夫云何袁氏之子四世三公



千人一士衛玠人陳平玉美吉日乘龍良時射雉香沈  
寶帳漏轉銅牌銀魚對躍玉燕投懷幸哉有子生也無涯  
俄驚釜破永歎珠埋落葉哀蟬寒林悲鳥孫楚情文張瞻  
夢兆嗟我悼亡思卿年少昔侍朱匳今迴丹旒離離青麥  
蕭蕭白楊驚鴻渺矣彩鳳云亡誰尋羅襪更覓香囊魂迷  
下蔡神往高堂面暈摧霞眉痕掩岫腸斷蘼蕪心傷荳蔻  
石作圍屏雲疑廣袖環珮空歸瑤琨永壽



重修先族祖姑瓊章仙女墓碑銘

代

蓋聞西池王母靈山都翠水之濱南嶽夫人福地主朱陵  
之洞檢天仙之玉籍多占蛇虺之祥擷閨秀之金荃自叶  
鸞凰之韻由來才女前生皆慧業文人曾是藐姑在處有  
淵泉處子亦有秦宮毛女餐柏葉以成仙唐室眉嬈飯胡  
麻而得道誤杜蘭香之小謫玉簡畱題羨羅鄂絲之飛昇  
金環待贈是則楞嚴貴種非同弄玉之王姬位業真靈詎  
比解珠之游女何況宿根清淨出自韶年累葉科名生從  
華胄學道棲霞之觀兄事王喬侍書駐月之宮母依女狄  
正標梅之迨吉方歌百兩盈門忽贈芍以將離空願十千  
維耦如我瓊章祖姑其生死誠有足異焉者也祖姑諱小

鸞字瓊章一字瑤期明工部主事天寥公諱紹袁之季女  
清寶應知縣橫山公諱燮之女兄也夫世祿之家鮮克由  
禮嬌女之愛豈曰過情矧乃靈鍾玉勝之奇幼稟金鑿之  
慧或性耽安逸弄易安居士打馬之圖或習好嬉遊尋鉤  
弋夫人藏彊之戲將見畫眉之暇祇適間情充耳之傍多  
陳翫具宜其覽衛恆之筆陣未解操觚披蘇蕙之璇圖有  
慚學錦也已惟我祖姑秉靈離異席厚鼎豐其姝表說懌  
之徽季女有尸齊之敬生成窈窕契德象以無心初識之  
無誦離騷而上口綺歲而工辭賦體辨齊梁筭年而學琴  
棋識超稽謝紅凋楓冷續佳句於吳江綠長苔肥覓仙踪  
於蔣徑詠鷓鴣天而寫志一夢初回演鴛鴦夢以傳奇三

仙下降此我祖姑之夙慧也自昔彩鸞鬢韻擇嘉耦於文  
簫雲英寄詩結塵緣於斐渾呪庭前之桃樹劉綱本夫婦  
同仙掇溪上之蕪菁阮肇成婚姻贅壻蘭昌三美頻傳鶴  
苑之書銀漢雙星有待鵲橋之渡人間天上皆朝雲暮雨  
之行踪月朗星稀多紅杏碧桃之艷影惟我祖姑十年不  
字八垢皆空內徵方聘以玄纁消息忽乖乎紅線妖興夢  
棗靈符王子堇之占數定剖瓜詩應呂仙翁之讖貯黃金  
而作屋俄驚月窟嬌藏飾白玉以爲棺忽逐雲旗晝下撫  
冰肌而緇幘掩燿升屋臯呼展玉臂而彤管書名舉帷尸  
解此我祖姑之靈修也且夫才子成佛在靈運之前天女  
見身授維摩之記鹿女闡法華之教佛母成胎蛤兒生切

利之天牧人有牧旣入無遮之會難追少廣之遊豈有曲  
奏玄靈闌入霓裳羽衣之譜道成丹熟復參黃花翠竹之  
禪惟我祖姑生有自來仙而成佛前身靈異隱居王屋之  
山再世姻緣作配清河之郡祇以凡心偶動不迷過去之  
根法性猶存未犯貪癡之戒是故鏡未圓而先破繭將結  
而終分碧海無波永隔蓬萊之路彩雲欲散難迴棠棣之  
車幻金色銀色之女身依舊曇花一現閱小千大千之世  
界不逢枯樹重生此我祖姑之善業也或者謂生也有涯  
歎浮生之若夢愛而不見問鍾愛其誰知苟非太上之忘  
情未免積思而生幻於是筵筭代卜斂靈響於空冥杯筴  
陳辭託神通於玄渺望李夫人於帷帳少翁能致神君寄



楊太真之鈿釵道士先招魂魄問傾國傾城之貌胡因寶  
婺先沈想胡天胡帝之容誰使瑤姬不返惟我祖姑始則  
示童真於有花架下沒則證佛果於無葉堂中月府僊人  
本屬姮娥之侶泐庵尊宿新招弟子之班供詞因審戒而  
花霏七字專工對仗聯句得唱酬而璧合五言自固長城  
是知三世識神未脫詩人之結習且喜一家眷屬永除梵  
嫂之糾纏此我祖姑之淨行也嗟乎巴邱月落二喬之杯  
土如新智水星羅七女之荒塋猶在弔齊桓公主之冢水  
亦稱神尋吳王愛女之墳湖猶未涸塵生羅襪宓妃步月  
之鄉壙掩巾箱桓女埋香之處抑有辭工黃絹題曹孝女  
之碑銘曾傳字刻青珉補隋清娛之墓誌荒村弔古猶思

青塚魂歸孤館談詩浪說秋墳鬼唱是有資於揮塵卻無  
與於驂鸞惟我祖姑瓊花表字卽色卽空玉蕊疑仙倏來  
倏去黃庭觀裏王妙想白日靈飛紫霄殿前謝自然青天  
翀舉山邱華屋原無生存零落之區方丈瀛洲都成縹渺  
虛無之境石灰囊懼畱痕迹何來玉盃金魚瓊花鏡追寫  
容光但見珠幢銀鶴菩薩雖連骨瑣難侔玉潔之茗華女  
嬃亦是掌珍不逐桃媿之根葉痛一棺之長閉悽然匱檻  
塵封託七尺之高原渺矣佩環聲斷然而壟上申採樵之  
禁賞薄王頭都中沿弔柳之風信傳仙掌何況譜通血脈  
諸姬本一姓之枝流族啟膏腴同祖盡三公之苗裔忍見  
殘塼委地等於北邙山上之叢坵任教欹柱沈沙置之東



郭墀間之野祭

恭綽

忝居族裔幸託宗盟生長仙城熟聞

眉子硯流傳之故實摩挲祖澤曾刊返生香搜輯之遺詩  
昔慕徽音有懷午夢近徵系本匪屬子虛白馬潮來遙望  
金閭之匹練紅羊劫換誰修吳郡之圖經宗人煥彬考功  
當纂編家乘之時有採訪先塋之役弁山攬勝拓修宋少  
保封樹之陵園溢瀆探幽重建明文莊免租之墓石更以  
湖渟分水是洛川神女之都埭築葉家有陳市仙姑之宅  
雨前麥飯潛防隧道狐窺月下梅林都厭墓門鴟止爰迺  
高培馬鬣大闢蠶叢題碑仿三女之塋金鳧夜浴營冢縮  
萬家之地石馬宵眠十里冬青一路染女貞之色雙峰春  
黛四山絕姑惡之聲放金枝玉葉之光寶相空畱陳蹟度

舊唐書馬仙舟  
三  
碧海青天之夜芳魂應戀故鄉鰕生亦墓下子孫敢援筆  
而廣祖庭之記紀歲用山中甲子且摩厓而刊孝闕之銘  
銘曰

南陽鉅郡東越華宗縉雲徙族金紫頌封家承法緒史紀  
靈踪粵惟有道是亦猶龍條枝秀出奕葉祥鍾名門誕毓  
淑女昭容是仙是佛何去何從卒歸梵淨卻避機鋒其一

笠澤之湄具區之浦一曲彼汾千年此土列岫鬟低遠山  
眉嫵秋月篋開春花裏舞碧草如莎白楊幾樹古墓犁田  
荒邱作圃鶴化何年鶻啼無主鬱鬱蔥蔥風風雨雨其二

恭聞令淑馨度韶齡含和蘊懿蹈架懷型習嫻女憲雒誦  
葩經門楣王謝戚里譚邢鳩蘿附託瓜葛伶仃呱呱寄養

娟娟歸寧如何天折遽赴幽冥傷哉婉孌逝矣孤熒

其三

南國無雙北方獨立林下風清顧家美襲舅氏誇容母兮  
飲泣追憶劬勞彌深嗚嗚花葉傳書珠璣貫什小山擬詞

大家撰集一卷茗香三升墨汁猗彼涓陽貽以端歆

其四

盜道無師有翅不飛旣歸佛國永別親闈舍來鵬鳥室閉  
蚬蟾蟾宮委佩獅座傳衣囊空壓線石冷支機梨雲似夢  
薤露何晞烏嘯花落人去春歸神光離合脂澤芳菲

其五

秋來椿穢冬生草弱花鄂棠摧英華薺落昔日池亭今時  
邱壑寶華佛庵疏香妝閣或存或亡以耕以鑿水逼前和  
石傾阿榔一穴孤存百堵斯作魂兮歸來顧而忻樂

其六

高岸爲谷深谷爲陵滄桑易變宰樹難憑香銷麝幌景闕

魚燈有時盜發或遇山崩黑灰未燼赤燦相乘幸茲鄉土  
守以雲初國無防護時有廢興松楸再植堂屋高增

其七

東澗記靈西堂集句鄒漪列仙徐鉞本事競述芳徽用昭  
穀美緬昔先人暨余小子三代清棊一家信史畫像徵題  
遺文授梓思貽令名聿修歲祀市石察書刊詞補誅

其八

重修長沙開福寺碑

長沙出湘春門郊行約二里有古蘭若焉志乘以爲五代  
馬殷建國會春故園保寧禪師飛錫舊處因而改造爲開  
福寺者也紅羊劫後猶存般若之題赤雀飛來忽被祝融  
之厄指銅駝於荆棘殿宇成墟閱金狄之滄桑河山改步  
湖堙碧浪都成黃茅白葦之鄉山抱紫微難尋螺黛蘭香  
之迹詩客無挂瓢之壁雖十八學士徒有欵歎山僧虛托  
鉢之床問五百阿羅誰將供養起樓臺於平地非同彈指  
華嚴壘堞壤爲高山必具羅胸邱壑衡山寶生和尚者法  
名法利別號澄源臨濟宗四十三世之法嗣也本道場之  
龍象亦法苑之鷗鷺幼慕清虛早披鬚於祈陽白雲山雲



岩上人座下力修梵行旋受戒於耒陽華嚴寺天輝長老  
函前方來駐錫之初卽發佈金之願萃四姓羅陀之眾頂  
禮泚沙合十方檀越之施心空樓炭爰乃鳩工卜吉始基  
奠定乎琳宮鴻藻增華傑構經營乎寶殿拓招提而延古  
德講經妙粲蓮花儲香積以供清齋會食味兼蔬筍塔修  
舍利蠡犀藏宰堵之光池闢放生魚鼈遂江湖之樂建藏  
經之閣七千卷大乘居三登說法之堂四二章開宗第一  
擲朱提而興土木厯六載而垂成披藍縷以啟山林儲五  
材以足用功真神速一莖草化丈六金身靈應感通三菩  
提結盈千珠網斯豈所云苟完苟美洵可謂之有始有終  
也已惟是茲寺之重建厥在今日有三難憶昔同光之交

斯際唐虞之盛四夷賓服梯航開寶布之源百物殷昌金玉等泥沙之賤吾湘中與將相出膺五等之龍章上國賓王例貢九江之龜錫萬金之產編爲甲秀之民五特之家祕有辛文之術昔稱貧國今本富區其時湘陰郭養知侍郎嵩燾眾推文苑之宗師恆假禪房爲吟社鯽魚名士多謔浪之詩牛馬史公哀倡訓之集厥後長沙王葵園閣學先謙流連芳躅迭主齊盟而同時陳程初鎮軍海鵬與德輝等亦復接席連茵啣盃屬草寸鐵禁持而白戰媿當蘇軾之奇才一條界破乎青山濫拾徐凝之惡札每當酒闌燭跋輒憂棟折榱崩無如術乏點金議同築室志勤運甓力薄爲山難收覆篑之功徒作望洋之歎今則四郊多壘

草木皆兵萬戶流離萑苻遍野國有周赧王之避債更胡地以安禪人無龐居士之散財復何心於佞佛此其時之難也湘楚昔爲靈均禮魂之域俗尙巫風後爲濂溪過化之邦人尊道學淫祠野祭相傳猶楚人好鬼之遺太極通書固早爲宋學開山之祖是故青衿髦士薦紳先生家圖問天呵壁之離騷戶誦闢佛火廬之原道而况老聃近鄰於苦縣里崇仁讓之風莊躋遠略乎溟池國本強梁之族自鬻雄開化厯今三千餘歲世不變其土風逮陳良悅道附於七十子徒士偏重於儒術值茲法教陵夷之日又兼兵戎俶擾之時雖持百匹縑紬疇設桑門之盛饌僅列一鑪鋤石難爲藍舍之供張此其地之難也九流旣廢三教



斯興顓漆分爲八儒釋老並稱二氏記休屠祭天之俗迦  
葉稱尊尋達摩面壁之踪曇花再現玄風暢於震旦妙法  
播於離維西竺去漢一萬二千里程經典先來白馬南朝  
有寺四百八十處所碑題早紀赤烏造像至千萬尊法軀  
儀鳳別雕善業寫經仿十七行童卷彩鸞工繕法華五燈  
會元傳其衣鉢三籃大藏飾以綫裝斯固發龍文千禩之  
光極象教一時之盛者矣然而三威蒙度丁景教之流行  
九品區人奉天方之真宰堂名禮懺猶傳也里之碑寺建  
清真欲奪如來之席羣言淆亂異教爭鳴近且婆羅門高  
唱密宗法門難稱不二真靈圖侈陳位業浮圖未許相參  
縱然神化丹青假託空空之妙手安得術精黃白飛來滾

滾之流泉此其世之難也雖然萬物本由心而造有形先  
始於無形百事以有志則成漸進何殊乎猛進寶生和尚  
入維摩丈室轉如意法輪抱精衛填海之誠矢愚公移山  
之志靈臺經始自兼將作大匠之工廣廈宏開附設貧苦  
孤兒之院美哉輪美哉奐望露冕之相聯如斯革如斯飛  
立風旛而不動是則一錢起劉智之廟未足喻其艱難百  
錠捐金后之宮無以比其神勇者也嗟乎槽分五馬三人  
之肥料終窮殿捧九龍一世之雄風安在瀛洲燕語想昔  
年文讌之歡娛月圃蛩吟悵今日清歌之消歇弔故宮之  
離黍藏古寺於芳林幸從三寶皈依長保有策府丹砂之  
故蹟贏得一碑矗立敢希踪韓陵片石之高文

長沙開福寺新建藏經閣記

一丈六尺之金身忽自梵天飛下四十二章之寶夾初從  
乾竺駝來佛言如是我聞演成經得億數言而盡世界無  
邊大會說其法有七二品之多蓋經律論三藏之文書早  
達四部洲之津岸而金水風十方之締構都成五印度之  
屏藩是故聶道真有眾經錄之編斯釋藏之條流愈晰迨  
至費長房爲三寶記之續斯沙門之譔述常新譬之老室  
守柱下之藏無關尹不能發五千言妙道猶夫孔宅畱壁  
中之蹟非魯恭何由黜卅九篇今文此開元釋教錄之成  
書所以有大功於淨土抑雍正佛經板之立庫乃得訓弘  
願於彌天也特是東方聖人西方達人水火競爭於末法

道高一丈魔高十丈波旬突起於須臾因是唐有會昌折  
毀寺廟之風宋有宣和復還冠巾之詔于斯時也三摩正  
覺僅餘燭火之光十力神通全被塗灰之擾而况文字語  
言之末曾何與於傳燈唄陀繙譯之煩勢將棄之覆瓿當  
道法陵夷之會正聲聞寂滅之時貝葉翻雲難逢吳十三  
孃寫經之女阿梨照海誰招黃三八郎雕板之工坐使崇  
文四部佔坊本庫本之多並輸上洞三清極南藏北藏之  
勝雖金剛經刻成天福無人續修寶藏之輪且銅造像流  
布人區何處更開石經之峪洪惟我 世宗憲皇帝深通  
內學振起玄風我 高宗純皇帝續述皇猷闡敷勝業于  
是七千餘卷之經典頒官本以廣流傳三十二相之莊嚴

讀遺經如親警欬取胡本舊經而參校存鳩摩羅什之新  
文攝婆羅外道以皈依得獅吼柱間之見證斯固合宋元  
明三朝之舊槩以勘正其異同集初中上一系之陳編而  
折衷乎淆亂也已先是長沙上林寺常靜法師曾施心願  
自備工貲入京請謁有司給領全部是爲會城有藏經之  
始將使法侶得入道之門今寶生和尚以開福寺精舍之  
闢將近千年叢林之興盛傳五代而四方觀禮曾無金繩  
玉檢之披八會窮源難求琅笈銀函之證遂乃援昔年之  
成案領全藏以分儲將謂七閣之收藏列架全從天一無  
異百城之坐擁充廚用足冬三所期人皆學陶元亮之流  
觀獲迷津之寶筏亦願客有如顧景怡之善論闡性海之



舊唐書馬休傳  
璿樞華言華夷語夷無事問疑於玄奘仁見仁智謂智何  
煩音義於慧琳試看飛閣流丹盡掃野馬塵埃之翳障卻  
望暮山凝紫上騰斗牛奎壁之文光通精文善法導達之  
眞詮世不乏譯經秦景辯廓落虛無吹求之眾謗我願當  
理惑牟融

長沙開福寺新修放生池碑銘

在昔茹毛飲血始開強食弱肉之風合土範金漸修火化  
炮生之利包犧作爲網罟江湖萬里無以遂水族之生燧  
皇實創庖廚宗廟四時不能廢獻人之獻故鱻鼈同以供  
王之膳而噉喙之口居多亦雞羊均爲養老之羞而游泳  
之羣獨貴自茲以降厥類斯繁食經除亥卯未之名雅訓  
釋乙丙丁之義鼈唇龜魚麤羸之屬天官職有專司魴鱉  
鱸鮮鯤卵之珍內則主之中饋備美物而魚麗于鬻別鱮  
魛鯁鯉之稱式嘉賓而燕樂以綏辨罟筐汕櫟之制考周  
書之貢物交趾出五尺鱣虵檢漢律之條文會稽獻三升  
鮪醬炙蟾風蛤產重眉州名蟹佳蝦歲充膳府乃至嘗子

公之鼃鼎因染指而禍及弒君進賭父以鼃羞非饗尸而怒逢飲客公儀作相邦人爭奉生魚羊續除官府吏先供食鯉蒨羹鱸膾張季鷹忽起鄉思菘菜鮓魚蕭武陵曾充聘享不知許事且食蛤蜊沈昭略將見諷於王融既設內齋復炙車螯王義真得有詞於劉湛褚淵受鮓魚之饋悉噉親遊何允貪蚶蠣之供侈陳方丈拾吳王之殘膾都成四寸之鮮鱗啜宋嫂之餘羹不惜萬錢之花費蚶蛇長逾數丈越人斫以爲上殺文蠡大容一升南土珍之爲美饌又况玄龜紫貝列本草之圖經玳瑁螭蟠供鉤柯之鏤琢藥物之需求旣廣勢將竭澤而漁梓人之取用無窮幾欲攔江而網是皆因利物而害物殊乖聖賢與物之懷而且



爲養生而殺生有辜天地好生之德是以尼山垂訓釣而不網亶父觀漁得而復釋老氏以清虛立教故羅天醮設清齋釋家以淨域爲飯故佛父譯名淨飯蓋十方世界皆生意之所彌綸而三教聖人本中和以爲位育此推恩及於禽獸商湯王所以祝犯命網之從寬博愛至於蟲魚唐肅宗所以詔放生池之廣設也長沙開福寺方丈寶生和尚旣新殿宇更拓園林沿舊有之陂塘成新開之池沼源頭活水直貫乎河流山足靈泉潛通乎地脈沿楊柳曉風之岸臨淵而樂甚濠梁采藻芹半水之宮在頰而制存郊學鳶飛魚躍窺翔潛而早悟天機鷺宿鷗眠斂觜距而不賤物命是可見仁心之所默化物類之相感通載小船而

千尾成斤但見陣雲之遠散設大罟而一鱗不獲無關佛  
咒之超生此間本遠隔城門永無殃及有隙仍壘成邱壑  
頗遂潛遊銜珠定有靈蛇信隋侯之恩必報飼米獨畱赤  
鯉知子英之道將成何須廣畝爲池遠學陶朱公之貨殖  
試看臨帶郭江徧刊顏魯國之碑文銘曰

茫茫大造攘攘羣生胞與一體東西二銘上古有祭祇設  
太羹諸侯無故且戒殺牲胡爲饕餮乃肆割烹亨家曾父  
斟雉彭鏗熊蹯象白鷓翠魚鯖肉食者鄙鼎養何榮我佛  
慈悲與人懺悔減膳非齋轆羹大快造善業塗出苦惱海  
地獄圖行屠酷業改庖丁善刀市無牛解濁氏連騎家無  
脯賣何況小鮮與彼羣介果腹無裨朶頤足戒水生卵化

一曰鱗蟲咸池浴日嘉穴藏風龍門點額鮫室潛踪與人  
無迂聚族相容殺機頓起舉網俄空魴鰈笱倣鱸鮪鼠窮  
別開生網坐闢幽宮水真功德法暢玄宗次日介蟲與鱗  
爲伍亦或陸居頗多穴處渾沌而生蹒跚而舞負甲以趨  
益孳其乳采作殽羞取供刀俎芥蓼椒薑鹽梅醬菹五味  
之盃八珍之輔假以逋逃依然生聚同居異族厥惟水禽  
鷓美有翼鶩取無心辟鴈鷓鷃鷓鴣鷓鴣交鷓是有鷺性不懷  
好音如此非類毋使相侵鴛鴦濯錦翡翠巢金安栖水國  
絕跡山林早知魚樂坐聽龍吟十力無邊四生有庇水是  
法源魚皆生饋佛性隨緣天香應瑞卯誦觀音蛤生叨利  
月印禪心雲盤卍字樂樹遶池天花墜地碧浪分流紫微

挹翠一水澄清百靈受賜

觀古堂駢儷文終

